

故宮博物院藏

四庫

全書

撤出本

彙編

第十六冊

故宮博物院編

故宮出版社

第十六册 目錄

南北史合注卷一百十二—卷一百十七 一

卷一百十二 三

卷一百十三 七七

卷一百十四 一五三

卷一百十五 二二七

卷一百十六 三一五

卷一百十七 三六九

欽定四庫全書

史部
南北史合注卷一百十三

第三分

欽定四庫全書

南北史合注卷一百十二

明李清撰

北史二十六

張黎

丘堆

伊馥


周幾

娥清

劉潔

古弼

乙瓌



列傳第十四



豆代田

車伊洛

王洛兒

車路頭

盧魯元

陳建

來大千

宿石

萬安國

陸真

呂洛拔

薛彪子

子琰

尉元

慕容白曜

和其奴

苟頽

宇文福

古弼

內入諸姓有吐奚氏孝文政古氏

代人少忠謹善騎射初為獵郎門下奏事以敏正稱明
元嘉其真而有用賜名筆後改名弼言有輔佐才也令
典西部與劉潔等分綰機要敷奏百揆太武即位以功
拜立節將軍賜爵靈壽侯厯侍中吏部尚書典南部奏
事

魏書曰弼以安西將軍從征赫連定與侍中張黎擊平涼定自安定率步騎二萬來救弼偽退誘之世祖使高車勅勒馳擊定斬首數千弼遂取安定

從征馮弘弘將奔高麗

魏書曰大臣古渥因衆心不欲率衆攻弘開城引官軍弼疑其詐不入城

高麗救軍至弘乃隨之令婦人被甲居中其精卒及高麗陳兵於外弼部將高苟子欲擊賊軍弼酒醉拔刀止

之故弘得東奔帝大怒黜為廣夏門卒尋復為侍中與
尚書李順使涼州賜爵建興公鎮長安甚有威名及議
征涼州弼與順咸言涼州乏水草不宜行帝不從既尅
姑臧微嫌之以有將畧弗之責宋將裴方明尅仇池立
楊玄庶子保熾假弼節督隴右諸軍討仇池平之

魏書曰劉義隆遣其秦州刺史胡崇之屯仇池弼邀
於蜀水臨陣擒之其衆走還漢中弼從祥郊山南入
義隆守將姜道祖退守狹亭諸將以道狹雪深用馬

不便皆遲留不進弼獨進軍使元齊等擊狹亭道祖
南走仇池平

未幾諸氏復推楊文德為主圍仇池弼攻解其圍文德
走漢川時東道將皮豹子聞仇池圍解議欲還軍弼使
謂曰若班師寇至後舉為難不出秋冬南寇必來以逸
待勞百勝之策也乃止帝聞之曰弼長策也制有南秦
弼謀多矣景穆摠攝萬機徵為東宮四輔與宜都王穆
壽並參政事遷尚書令弼雖事務殷湊而讀書不輟端

謹慎密口不言禁中事功名等於張黎而廉不及上谷人上書言苑囿過度民無田業宜減大半賜貧者弼入欲陳奏遇帝與給事中劉樹碁弼侍坐良久不獲申聞乃起於帝前捽樹頭掣下牀以手搏耳以拳歐背曰朝廷不理實爾之罪帝失容放碁曰不聽奏事過在朕樹何罪置之弼具狀聞帝竒弼公直皆可其奏以丐百姓弼曰臣之遲志君前非無罪也乃詣公車免冠徒跣自劾請罪帝召謂曰卿其冠屢吾聞築社之後蹇蹙而築

之端冕而事之神與之福卿何罪自今以後苟利社稷
益國便民者雖復顛沛造次卿為之無顧也帝大閱將
校獵於河西弼留守詔以肥馬給騎人弼命給弱者帝
大怒曰尖頭奴敢裁量朕朕還臺先斬此奴弼頭尖帝
名之筆頭時人呼為筆公屬官懼誅弼告之曰吾以弱
馬給田獵使盤游不適其罪小不備不虞使戎寇恣逸
其罪大今北狄孔熾南鹵未滅狡馬之志窺伺邊境是
是憂也故選肥馬備軍實為不虞之慮苟國家有利我

寧避死乎明主可以理干此自我罪帝聞而歎曰有臣
如此國之寶也賜衣一襲馬二匹鹿十頭後車駕田於
山北獲麋鹿數千頭詔尚書發車牛五十乘運之帝尋
謂從者曰筆公必不與我汝輩不如馬運之速遂還行
百餘里而弼表至曰今秋穀懸黃麻菽布野猪鹿竊食
鳥鴈侵費風波所耗朝夕三倍乞賜矜緩使得收載帝
謂左右曰筆公果如朕卜可謂社稷之臣初楊難當之
來詔弼悉送其子弟於京師楊玄少子文德以黃金三

十斤賂弼弼受金留文德而遇之無禮文德亡入宋帝
以其正直有戰功弗如罪責太武崩吳王立以弼為司
徒文成即位與張黎並坐議不合旨俱免傳有怨謗之
言其家人以巫蠱告俱伏法時人冤之

愚按弼受太武殊恩及宗愛兩弑不發一謀安其祿
位以此見誅未盡寃也但坐以巫蠱則非

張黎鴈門平原人善書計道武知待之明年器其忠亮
賜爵廣平公管綜機要太武以其勲舊任以輔弼除大

司農卿軍國大議黎常與焉以征赫連定功進號征北
大將軍與樂安王範濟南公崔徽鎮長安清約公平甚
著聲稱代還日家無餘財太武征涼州柔然吳提乘虛
入寇黎與司空長孫道生拒擊走之景穆初摠百揆黎
與崔浩等輔政忠於奉上非公事不言詔賜浩黎布帛
各千足以褒舊勲吳王余立以黎為太尉文成立與古
弼俱誅

劉潔長樂信都人昭成時慕容氏嫁女於國潔祖父生

為公主家臣隨入魏賜以妻妾生子堤位樂陵太守封信都男卒潔襲堤爵數從征討進爵會稽公後與永安侯魏勤及功勞將軍元屈等擊吐京叛胡為所執送赫連勃勃潔聲氣不撓呼其字與言神色自若勃勃壯而釋之後得還國典東部事明元寢疾太武監國潔與古弼等選侍東宮對綜機要太武即位奇其有柱石用委以大任及議軍國朝臣咸推其能遷尚書令改為鉅鹿公

魏書曰時南州大水百姓阻饑潔奏曰頃邊寇內侵
戎車屢駕郡國之民雖不征討服勤農桑以供軍國
近山以東遍遇水患應加哀矜以弘覆育帝從之復
境內一歲租賦潔與樂平王丕督諸軍取上邽及至
諸將咸欲斬其豪帥示威潔不從撫慰秦隴秋毫無
犯人皆安業帝欲發隴右騎卒以伐高麗潔進曰隴
土新民始染大化宜賜優復以饒實之然後可用帝
深納之